

Алишер Навоий номидаги Ўзбекистон Миллий кутубхонаси

1870 йилда асос солинган. Ўзбекистон Республикаси Президентининг 2002 йил 20 февралдаги ПФ-3029-сон «Илмий-тадқиқот фаолиятини такомиллаштириш тўғрисида»ги Фармониغا мувофиқ Алишер Навоий номидаги Ўзбекистон Республикаси Давлат кутубхонаси ва Республика илмий-техника кутубхонаси негизида ташкил қилинган Алишер Навоий номидаги Ўзбекистон Миллий кутубхонаси узок тарихга эга. Туркистон генерал губернатори К.П.Кауфман 1867 йил 16 августда Халқ маорифи вазирлиги, Фанлар академияси, Оммавий кутубхонага, География жамиятига, Россия Бош штабига кутубхона ташкил этишга ва китоб омборларидан дублет нусхали нашрларни бериш билан янги кутубхона асосини яратишга ёрдам беришни сўраб мурожаат қилди. Шу давр кутубхона тарихининг бошланиш даври эди. 1870 йил майида бўлажак Тошкент оммавий кутубхонасининг ядросини ташкил қилган 2200 дан кўпроқ жилд (200 номдаги) нашр йигилган эди, бу оммавий кутубхонани очишга имкон берди. Ўлканинг катта билимдони ва кучли библиофил, кутубхонанинг биринчи директори Н.В.Дмитровский (1841– 1910) ўзининг сергайрат фаолияти билан Тошкент оммавий кутубхонаси тарихида унинг равнақи учун муҳим роль ўйнади.

Кутубхона фаолият кўрсата бошлаган даврда китобхонларнинг асосий қисмини харбийлар ташкил этган.

Кутубхона Марказий Осиё минтақасидаги йирик ва қадимги китоб сақлаш масканларидан бири бўлиб, 28 номдаги турли ноанъанавий хизматларни кўрсатади.

Алишер Навоий номидаги Ўзбекистон Миллий кутубхонаси ахборот ва маданий-маърифий муассаса бўлиб, кутубхоначилик, библиографик, илмий тадқиқот, илмий-методик ва ахборот фаолиятини олиб боради. Кутубхона фонди мазмунан универсал миллий ва хорижий матбуотнинг ноёб тўпламидир. Кутубхона фаолиятининг бош мақсади, бутун инсоният билимини акс эттирган, аввало, Ўзбекистонга ва унинг миллий манфаат ларига тааллуқли ҳужжатларнинг универсал фондини йиғиш, сақлаш ҳамда жамият фойдаланиши учун тақдим этишдир.

Ноёб ва нодир нашрлар фонди кутубхона китоб коллекциясининг фахридир, у 250 мингдан ортиқ нашрдан иборат. Уларнинг 15 мингдан ортиги нодир китоблар ҳамда қўлёзмалардир. Кутубхонанинг ўта ноёб тўпламида Ўрта Осиёнинг 1917 йилгача бўлган тарихи, этнографияси, маданияти ва географиясига оид ўзига хос энциклопедия бўлган 594 томлик ноёб «Туркистон тўплами» ҳамда А.П.Кун тузган 4 қисмдан иборат 10 томлик 1200 ноёб фотосуратларни ўз ичига олган Туркистон ўлкаси аҳолисининг турмуш тарзи, урф-одатлари тўғрисидаги «Туркистон альбоми» алоҳида ўрин эгаллайди.

Республика тарихи бўйича XIX асрнинг охири XX асрнинг биринчи чорагидаги ўлкашунослик мавзусидаги адабиётлар, биринчи Туркистон литографик, вақтли нашрлари, қўлёзма китоблар коллекцияси, муқаддас китоб–Қуръоннинг турли нашрлари тадқиқотчилар учун катта қизиқиш уйғотади. Кутубхонада қадимий рус китобларидан XVI аср матбаа санъати ёдгорлиги, Иван Федоров томонидан 1581 йилда Острог шаҳрида босилган «Острожская библия» китоби, 1647 йилда Москвада черков-славян шрифти билан босилган дунёвий мазмундаги «Учение и хитрость ратного строения пехотных людей» биринчи рус китоби, Петр даври китоблари–Леонтий Магнитскийнинг «Арифметика»си (1703 йил), Буюк Петр даври «Хмочновская рукопись» ва бошқалар мавжуд. Фарбий Европа китобларининг нодир коллекциясида 1489 йилда Нюрнбергда босилган «Девятая Немецкая библия» инкунабули, Б.Эрбелонинг 1697 йилда Парижда нашр қилинган «Восточная библиотека»си мавжуд.

Буюк аждодларимиз Ал-Бухорий, Ат-Термизий, Аҳмад Яссавий, Баҳоутдин Нақшбандий, Ал-Хоразмий, Ал-Беруний, Ибн Сино, Алишер Навоий, Амир Темур, Мирзо Улугбек, Бобур асарлари кутубхона фондида кўз қорачигидек сақланмоқда. Чўлпон, Фитрат, У.Носир, Ҳамза, Ғ.Ғулом, А.Қаххор ва бошқа ижодкорларнинг ҳаётлигида чоп этилган асарларнинг илк нашрлари, рус адиблари А.С.Пушкин, Л.Н.Толстой, А.П.Чехов, А.Н.Толстойларнинг асарлари бебаҳодир.

Хорижий тиллардаги адабиётлар фонди 75 дан зиёд тиллардаги ижтимоий-сиёсий, гуманитар, табиий-илмий ва техника масалаларига оид нашрлар бўлиб, бугунги кунда 350 мингдан ортиқ нусхани ташкил этади.

Кутубхонанинг Санъат бўлими ўзига хос нотали-муסיқавий асарлар тўпламини, ўзбек классик ва жаҳон муסיқаси грампластинка ёзувларини, 150 мингдан ортиқ тасвирий ва амалий санъат нашрларини жамлаган.

Техникага доир адабиётлар (2 млн.дан ортиқ нусхада) ҳам мазмунига кўра ўзига хос бўлиб, меъморий-техник ҳужжатлар, саноат каталоглари (коғозда) тўплами (33700 нусхадан ортиқ)дир.

Автоматлаштириш янги ахборот технологиялари бўлими ягона автоматлашган кутубхона тизимини қўллайди ва ривожлантиради, электрон каталог ҳамда электрон маълумотлар базасини яратишда методик ёрдам беради.

Кутубхона ўз нашриёт ва босмаҳонасига эга бўлиб, ноширлик ҳамда матбаа фаолияти билан шугулланади.

1988 йилдан кутубхоначилик жараёнини автоматлаштиришга, 1999 йилдан Россия Давлат Илмий техника кутубхонасининг ИРБИС автоматлаштирилган ахборот дастуридан фойдаланган ҳолда ватанимиз ва чет эл янги нашрларининг электрон каталогини яратишга киришилди. Кутубхонанинг электрон каталоги бугунги кунда 25 мингдан ортиқ янги адабиётларнинг библиографик ёзувлари ва даврий нашрларнинг аналитик ёзувларини сақлайди. Кутубхона ўз маълумотлар базасини яратмоқда ва “Curret Content”, “MicroMedex”, “Medine”, EBSCO ва маълумот базалари билан ишлаш имкониятидан унумли фойдаланмоқда.

Кутубхона 1923 йилдан бошлаб босма асарлардан мажбурий нусха ола бошлаган. 1948 йилда кутубхонага Алишер Навоий номи берилган.

Кутубхона 1956 йилдан буён халқаро китоб алмашувини амалга ошириб, унинг шериклари жаҳоннинг 24 мамлакатидан 30 дан ортиқ ташкилотлардир. Кутубхона йирик халқаро кутубхоначилик ташкилотлари: ИФЛА, ЕвроОсиё кутубхоналар Ассоциацияси, электрон кутубхоналар ва янги ахборот технологияларини ишлаб чиқарувчилар ҳамда фойдаланувчилар халқаро Ассоциациясининг аъзоси.

Кутубхона кўплаб халқаро ташкилотлар ва жамгармалар билан, шунингдек, Ўзбекистонда аккредитация қилинган чет мамлакатларнинг элчихоналари билан мустаҳкам ижодий алоқалар ўрнатган бўлиб, маданияти, диний қарашлари ва тарихий илдизлари турлича бўлган халқларнинг яқинлашишига ўзининг ҳиссасини қўшмоқда.

Ҳозирги кунда кутубхона фонди жаҳоннинг 75 тилларидаги деярли 10 млн. нусхага етган.

Кутубхона республикамиздаги барча кутубхоналарга кутубхонашунослик, библиографияшунослик ва китобшунослик соҳалари бўйича методик раҳбарлик қилади.

ЎЗБЕКИСТОННИНГ ЙИРИК КУТУБХОНАЛАРИ

Методик маълумотнома

Алишер Навоий номидаги Ўзбекистон Миллий кутубхонаси нашриёти
Тошкент – 2004